

四庫全書

史部

欽定四庫全書

史部

劉錄卷二

詳校官監察御史臣沈孫璉

檢討臣德生覆勘

總校官進士臣繆琪

校對官助教臣胡子襄

謄錄舉人臣鍾廷瑛

欽定四庫全書

史部十一

剡錄

地理類三

都會郡縣之屬

提要

臣等謹案剡錄十卷宋高似孫撰似孫字續

古號疎寮宋詩紀事作餘姚人而是書自序

自稱鄞人則厲鶚誤也淳熙十一年進士歷

官校書郎守處州陳振孫書錄解題稱似孫

為館職時上韓侂胄生日詩九首每首皆暗

用錫字寓九錫之意為清議所不齒知處州
尤貪酷其讀書以奧僻為博以怪澁為奇至
有甚可笑者就中詩猶可觀周密癸辛雜識
亦記其守處州日私挾官妓洪渠事其人品
蓋無足道其詩則疎寮小集尚有傳本而文
章不少槩見此書乃所作嵎縣志也嵎為漢
剡縣地故名曰剡錄前有嘉定甲戌似孫自
序及嘉定乙亥嵎縣令史安之序蓋成於甲

成而刊於乙亥故所題先後差一年其書首
篇為紀年次為城境圖次為官治志附以令
丞簿尉題名次為社志學志附以進士題名
次為廩驛樓亭放生池版圖兵籍次為山水
志次為先賢傳次為古竒跡古阡次為書次
為文次為詩次為畫次為紙次為古物次為
物外記次為草木禽魚徵引極為該洽唐以
前佚事遺文頗賴以存其先賢傳每事必註

其所據之書可為地志紀人物之法其山水
記仿鄴道元水經註例脉絡井然而風景如
覲亦可為地志紀山水之法統核全書皆序
述有法簡潔古雅迥在後來武功諸志之上
殊不見怪澁可笑即所作子畧亦不甚遠於
人情而陳振孫云云殆不可解蓋南宋末年
道學一派惟以語錄相傳習江湖一派惟以
近體相倡和而似孫所述多魏晉以來詩文

事迹與當時風尚相左故駁而走歟乾隆四
十三年七月恭校上

總纂官臣紀昀 臣陸錫熊 臣孫士毅

總校官 臣陸費墀

剡錄原序

山陰蘭亭禊剡雪舟一時清風萬古冰雪王謝抱經濟
具二戴深經學奈何純曰高逸也嗚呼山川顯晦人也
人隱顯天也天下多奇山川而一禊一雪致有爽氣可
謂人矣江左人物如此然二戴剡王謝亦剡孫阮輩又
剡非天乎漢迨晉永和六百餘年右軍諸人乃識剡永
和至皇宋嘉定幾千年史君尹剡訪似孫錄剡事剡始
有史桑欽水經酈道元註道元魏人先儒辨其北事詳

南事畧似孫鄮人也如其精覈俟剡人宋嘉定甲戌高似孫

剡在漢為縣在唐為嵯州未幾復為縣本朝宣和間以剡為兩火一刀不利於邑故更今名邑舊有鄉四十後分十有三別為新昌縣今所存纔二十七鄉耳夫州縣之名雖數變更然山川之靈蓋自若也使剡古而有志則歷代因革廢興之典百世可知也余懼夫後之視今亦猶今之視昔故為剡錄十卷錄皆高氏所作凡山川

城池版圖官治人傑地靈佛廬仙館詩經畫史草木禽
魚無所不載度此板可支百年後之人毋以印利而輒
廢斯書也嘉定乙亥縣令鄞人史安之

欽定四庫全書

剡錄卷一

宋 高似孫 撰

縣紀年

越都督紹興府為縣八望曰嵯縣

字書曰四山為嵯四水為雪

縣有

嵯山

鄞道元水經曰嵯山與嵯山相連

又有嵯亭

十道志曰剡至嵯亭絕湍險商客往

來皆以裝束齊僕射張稷宰此縣生子名嵯字四山虞騫至嵯亭詩命楫尋嘉會信次歷山原捫天上雲

紀與石下雷奔澄潭寫度鳥空嶺應鳴猿榜歌唱將夕商子處方昏

漢剡縣屬會稽郡

道書曰兩火一刀可以逃言剡多名山可以避災也梁載言十道志曰識

曰兩火一刀可以逃自漢以來擾亂不少故剡稱福地梅福四明山記曰魏揚德祖至四明山逢一老人曰我見澗中涌泉流一金刀兩仙人把神火趁之可往尋之德祖行前見兩人把神火及得水中金刀可長二尺二人者見德祖條去德祖曰兩火成炎字炎邊得刀是為剡字因號剡溪又曰剡山德祖為銘二百字刻此峯羅隱剡景詩兩火一刀罹亂後會須乘興月中行

唐武德四年平李子通

唐鄭言有平剡錄一卷

以剡縣立嵯州及

剡城縣

八年廢嵯州及剡城以剡縣仍屬越州

趙叡發剡中詩正懷王謝俯長

流更覽餘封識嵯州樹色老依官舍晚溪聲涼傍客
衣秋南巖氣爽橫郭郭天姥雲晴拂宇樓日暮不堪
還上馬蓼花風起路悠
悠趙嘏詩蓋用嵯州也

宋宣和三年方臘平改剡縣為嵯縣知越州劉述古言
剡有兵火象欲以嵯名縣詔從之

城境圖

城

按漢剡縣城在今縣東北舊經曰嵯城周十二里高一丈厚二丈輿地志曰城開門向江縣不開南門開即有寇唐武德中立剡城縣有城池括蒼管晉修城記曰會稽縣八剡為清勝承平日久橫目習治庚子之冬睦寇狂勃剡寇應之縣有城壘圮弗克守為賊巢穴明年春帥劉公述古統制一道掃清賊黨謂令

張誠發卒徒虔事課工督程出緡粟以儆夫孽地段以就役甫閱旬朝完壁高堞城之環亘十有二里未幾寇率其徒擁梯壁下仰視完壯夫氣奪色將兵出銳掩之俘馘自是竄伏孽不熾焉侯智宏遠知所先後借不急此孰與民保時績

維茂磨石無愧宣和三年作

門

東曰東曦西曰西成南曰望仙北曰通越

坊

坊二十四曰訪戴秀異字民佐理集賢招提繼錦通安繼孝齊禮遷善桃源兆慶迎春嘉會仁德弦歌醴

泉清河進德妙音豐義成裕化民

鎮

縣東一百步為剡鎮出舊經今廢邑民於縣西惠安寺前池內得一石題曰瞻都鎮又曰當鎮奉勅旨重開河池以防火燭已丑歲二月日間北淨池天慶觀有錢氏時東都文移益稱杭為西都越為東都此鎮即是剡鎮錢氏有所更易耳

蛟井鎮在縣西南一十五里舊經曰山下有井

井有蛟因是為名宣和四年置

寨

長樂寨在縣西南五十里宣和三年知越州劉述古

奏置

管界寨在縣西七十里紹興二十年浙東諸司奏創
境

在府東南一百八十里境東西二百七十六里南北
七十里東至奉化縣一百四十里界陸照嶺西至諸
暨縣一百三十六里界勞績嶺南至新昌縣一十五

里界胡塏北至會稽縣五十五里界池湖東南到新
昌縣界一十五里西南到東陽界九十里東北到上
虞界六十六里西北到會稽縣六十二里

鄉

崇信鄉有休祥甘泉竹山懷安剡中里 莖節鄉有
灌濤昇仙馴習思善澄江里 靈山鄉有欽義下闡
靜安守義崇孝里 金庭鄉有昌化善政惟新永寧
緣德里 忠節鄉有三峯孝嘉石鼓忠節脩仁里

孝節鄉有新豐從化招安綏安方山里 孝嘉鄉有石

鼓桐栢安樂忠節安義里 崇仁鄉有感化霞丘靜

林歸善愛敬里 永富鄉有克遜西清東闡餘風禪

房里 崇安鄉有澄清懷善依賢化俗清安里 富

順鄉有長敬新安溫泉慈烏里 清化鄉有懷善開

明欽賢習善招賢里 羅松鄉有紫巖雙壁中川斷

金豐樂里 刻元鄉有尊賢澹城中和光明積善里

昇平鄉有承霞靜豐尚賢大和五山里 仁德鄉

有甘棠永樂餘糧歸仁金塘里 方山鄉有金節永
壽懷仁通山光德里 禮義鄉有長安仙林平樂懷
忠新安里 桃源鄉有永闡白泉長樂崇信安居里
積善鄉有南巖雙壁中川豐樂斷金里 繼錦鄉
有馴善攀轅鳴弦戴星遷星里 開元鄉有靜居迴
鄉招仁居賢冰魚里 長樂鄉有崑山楊明剡元禮
義寧安里 太平鄉有壁潭擇賢懷仁建昌懷信里
康樂鄉有遊謝宿剡竹山康樂感化里 遊謝鄉

有康樂明登宿星暝投吹臺里 靈芝鄉有石床東
節正筠化善里

水經曰吳黃門郎黃哀明居嶧縣宏訓里考之地
圖今無此里也並節舊經曰並音無字書曰並莢
也本草通曰莢繼錦舊名治化天聖中邑人史淪
登進士第其子叔軻繼之縣令魏琰改今名齊唐
題史氏西園詩戴水寒流對軒檻桃源深徑入漁
樵陳克詩雨裏落帆遊謝鄉寒聲古木共荒涼四
山為我洗蒼玉况有故人歸上方
故人汪彥章也時寓東山國慶院

官治志

縣治據剡山之陽歷坡而升樓觀竦峙頗似會稽府譙

登眺所臨溪山陳象如顧凱之所云千巖競秀萬壑爭
流者孔奕會稽記曰剡縣治在江東吳賀齊令始移今
治公廳相直舊有德星堂名迎薰堂今堂既廢扁榜亦
不存所可考者有宣和間盧天驥詩云剡溪詩尹亦何
人作堂餉客名迎薰雖有桃李姓潘人紅梅一窠香入
雲東有東園有四山閣閣規模庠隘寢就傾圯園存斷
碑而已嘉定八年尹史安之誅茅營新屋且撤舊而更
之增敞縣樓廣四山閣即廳之東為堂復舊迎薰之名

其北為面山堂累石成山玲瓏盤錯因山之趾注水為池雜藝卉竹相與映發亭榭參錯殆十餘所皆史尹所創也

古令長

吳卜靜字元風吳都人為剡令

賀齊字公苗山陰人為剡長吏斯從為姦斬之從族黨糾合千餘人攻縣齊開城門擊破之

晉周翼却鑿之外甥少遇饑亂賴鑿得存却亡翼為剡

縣令解職歸心喪三年後歷青州刺史少府少卿

謝奕字無奕陳郡陽夏人父哀為吏部尚書奕少有器鑒歷郡太守掾為剡令有一老翁犯法謝以醇酒罰而遣之累遷豫州刺史追贈鎮西大將軍

李充字宏度江夏鄂人初辟丞相掾嘗歎不被遇殷揚州知其家貧問君能屈志百里否李答曰北門之歎久已上聞窮猿奔林豈暇擇木遂授剡縣令

殷曠之仲堪子有父風仕至剡令

宋王鎮之字伯重祖者之位中書郎父隨之上虞令鎮之為剡令並有能名

周顒字彥倫宋明帝頗好元理以顒有辭義引入殿內親近宿直帝所為慘毒顒輒誦經中因緣罪福為之少止元徽中為剡令有恩惠百姓思之

齊張稷字公喬母疾時稷年十一侍養夜不解帶每劇則累夜不寢及終毀瘠過制杖而後起州里謂之純孝齊永明中為豫章王嶷主簿以貧求為剡令會山

賊唐寓之作亂稷率厲部人保全縣境

梁王懷之剡令

陳徐陵剡令

唐張子胄剡令

宋令題名

周在田

晁

陳求古

譚雍

魏琰

林槩

章珣

益參

沈振

丁寶臣

過

胡格

高安世

聶長卿

江相

鄭宗回

劉繪

晏明遠

宋順國

施

侯臨

蘇駟

賈公述

宣德郎元豐六年
是年新官制行

宋廣國

錢長卿

王知元

吳賁

史祈

劉旦

張諤

呂必強

俞應之

符綬

程容

張慶遠

鄒秉均

孫汝秩

宋旅

孫潮

莫伯輜

應彬

楊植

宋宗年

范仲將

姜仲開

錢塢

趙不退

毛鐸

郭康年

蔡純誠

韓晦

李耆年

趙渙之

郭契夫

趙伯楨

任望之

蘇誦

吳憐

陳嘉謀

李耆碩

張商卿

韓元脩

鄭逸民

季光弼

成欽亮

張注

李拓

陳謨

葉籛

劉渠

周悅

詹入民

滕璘

胡大年

謝渠伯

趙汝遇

史安之

蔣志行

趙彥傳

魏岨

蔣峴

劉長卿寄剡中諸官詩

訪舊山陰縣扁舟到岸涯故林
嗟滿歲春草憶佳期晚景千峯

亂晴江一鳥遲桂香留客處楓暗泊舟時舊石
曹娥篆空山夏禹祠剡溪多隱吏君去道相思

許渾送剡縣薛明府詩

車馬楚城壕清歌送濁醪露花羞別淚煙草讓歸袍烏浴春塘

暖猿吟暮嶺高尋仙在仙骨不用廢牛刀

方干和陳明府登縣樓詩

郭裏人家如掌上簷前樹木映窓樞煙霞若接天台地分

野應侵婺女星驛路古今通北闕仙溪日夜入東溟綵衣才子多吟嘯公退時時見畫屏

方干送剡縣陳永秩滿歸越詩

俸祿三年後程途一月間舟中非客路鏡裏是

家山密雪霑行袂離盃變別顏古人唯賀滿今日喜同還

王荆公寄丁元珍詩

溪水渾渾來自北千山抱水清相射山深水急無艇子欲從故人安

可得故人昔日此水上樽酒扁舟慰行役津亭把酒坐一笑我喜滿顏君動色論新講舊惜未足落日低

回已催客離心自醉不復飲秋果初寒空滿席今年却坐相逢處惆悵相逢別時迹可憐溪水自南流安得溪舟問消息

陸經送丁中允宰剡詩

塵土官曹幾處閑君今作邑好開顏落帆直向剡溪口入境先

登天姥山魚鳥半和風俗處雲霞多雜簿書問雪晴須去尋安道名作經宵興盡還

王平父送聶剡縣兼呈沈越州詩

剡溪清瀉映檀藥天姥花飛載酒船憶我

少年來蠟屐羨君今日去鳴弦從容人樂漁樵外瀟灑詩隨簿領邊太守相逢應見問為言多病憶林泉

丞治

在縣之東南佐理坊治東有月我軒

題名

季祐之

林通

苗元裔

沈昇

毛亶

常樟

趙士叟

許殼

曾勰

劉佺

呂

王中孚

時壽

韓愿胄

章騫

周玘

吳栢

高子津

陳戍

梁立

吳道夫

陳彭壽

項鷄

唐仲義

蘇彬

陳昌年

楊浚

樓瀟

俞杭

沈俊心

解汝為

楊遵

張子榮

應泰之

趙崇謨

劉厚南

王彝倫

簿治

縣之右依剡山顏有登眺趣山址多林樾嘉定八年尹史安之創建於縣左訪戴驛之舊址治有朔

風堂

題名

文繩世

劉士野

吳雍

陳友仁

司馬僖

蔣鐔

刁駿

靳

蘇林

江濤

鄭圭

趙崇規

葉梓

趙善恕

陳秉禮

鄭伯行

鄭宰

錢觀光

邊沂

姜强立

趙源夫

李密

徐愿

沈恣

沈文煥

趙必鼎

羅隱寄剡溪主簿詩

金庭養真地朱篆會稽官境勝堪長往時危喜暫安洞連滄海濶山

擁赤城寒他日拋塵土因君擬鍊丹

梅聖俞寄剡溪主簿臧子文詩

剡溪無淺深歷歷能見底潛鱗莫苦窺塵土聊

堪洗古木潭上陰遺祠巖下啟應識道傍碑因風奠醪醴

尉治

都丞治之東治西有隱吏軒

題名

吳秉

宋易

薛鎡

韓晝

干閱

楊炬

程衍

侯杞

林懋能

祝溥

陸釜

杜師顏

吳正國

張永

魏興祖

趙師向

謝深甫

陳紀

干汝功

鍾闡

林昇

向士貴

趙舉

錢聞善

胡之邵

宋元老

趙崇原

支文

趙彥垠

吳元章

任謙之

黃飛

姜漸

邵三傑

權官治

治在縣南三千步為稅所廳舊在縣東遷善坊尹史安之移於縣西化民坊

社志

社

舊經在西南後移在此嘉定八年尹史安之重建於縣西

學志

崇寧二年以舊學增建五年六月罷八月復置學五十區為緡錢一千四百三十有七糧為斛一千五百四

十學長諭直學各一人齋長諭各一人學生文士五十人武生闕焉小學教諭一人小長一人學生四十人出政和學制嘉定八年尹史安之得絕產

舊經載孔子廟堂在縣東南慶歷八年縣令丁寶臣所

創臨川王安國平父為記

今不存

修學碑

慶歷八年五月旦

太子中允 丁寶臣

天之道運乎上地之道處乎下聖人之道行乎其中一物不生非天地之道一民不治非聖人之道自堯舜

禹湯文武成康至孔子千餘年治天下者同其道也
亂天下者異其道也刻令沈振初築學舍未及完而
徙他官寶臣至則嗣而成之遷殿於其中塑孔子像
高第十人配坐左右新門嚴嚴應門兢兢兩序翼翼
中庭砥平令與學者春秋釋奠朔望朝謁於斯學也
其可廢乎噫聖道與天地無窮天地毀則聖人之道
或幾乎熄學其可廢乎

宣和中燼于盜建炎元年令
應彬建孔子殿後三年蜀郡

范仲將始置廊廡又明
年淄川姜仲開始大之

修學碑

汝陰
王銍

嶮西南隅羣峯之麓下臨剡溪山川環拱氣象雄張有
學焉慶厯八年令丁元珍始加興葺宣和初焚於兵
建炎元年令應侯彬建孔子禮殿三年春蜀郡范侯
仲將崇廊廡備像設因其舊而升大之又明年淄川
姜仲開以學為急又建學堂移殿廡與門南向致厚
於學者靡不至也落成於紹興五年秋先王建學校
匪在絃誦威儀以德行道藝教養成就其才將以明

師友之道世無師友道不傳也孔門答問獨於顏子告其大者子夏子張為諸侯師子貢築室原憲棄仕所被者遠也孔子沒而學進者曾子也一以貫之許之以道矣曾子傳子思子思傳孟子所謂忠恕所謂誠明所謂養氣一也今夫辯足以使四方勇足以將三軍一為不善不足以訶僕妾氣懾失據不在大也是未聞曾子子思孟子大勇乎學者顯窮齊致生死不變蹈道自樂至於沒齒不可一日廢其常心而已

晉南渡王謝孫李支許之倫初過浙江為剡中山水
清放之遊一時稱高會不知邑東餘姚有諸馮之地
舜所生也其北會稽之地禹所沒也舜禹功被萬世
而有見於遺俗亦聞聖人之至德乎范侯俊明高爽
健於立事姜侯剛明廉肅政在急吏寬民人大化服
郁郁然洙泗之風矣儒學為吏師政事出經術戎馬
之間力興學校知急所先所立卓矣俾刻於石知所

勸焉

性之外舅曾公袞以書稱此記曰會稽之地但知王謝風流不知諸馮禹跡實為風俗所繫其

有益世
教乎

修學碑

乾道癸巳七月

左朝議郎主管
台州崇道觀

周汝士

簿括蒼江公尉臨海謝公視事之初謁夫子廟歷視傾
歌上漏下濕諸生無所歸因愀然曰政孰先於此同
心之言其應如響於是定規摹審材用聚糶糧命徒
庸弊者葺之壞者新之課有限試有法誘掖不倦發
於至誠諸生激昂日進於學剡之文治煇然一變蓋
數十年未有也古之仕者以其所學後之仕者以其

所不學古之學者一毫未信而使之仕雖聖人有所不能後之學者幸而入政往往視所學為空言謾不知省曰從事於斯吾知為政而已也不知所學為何事也昔魯脩泮宮從公于邁無小無大蜀起學宮邦人向化鴻儒奇士間生特起異時揆藻天庭淵源四海如游夏輩可不知所自耶

新學

舊在縣西五十步嘉定七年尹史安之移建於縣西南繼錦坊為屋百區前有泮水秀異

亭

嘉定七年史安之行尹事三歎舊宮荒隳士失肄業相
攸剡山庾兌之隅樂其崇峻敞開山水明美如杜子
美所謂剡溪秀異李太白所謂剡水石清妙者迺匠
新宇轍轍鬼志於鏗風教琢翹楚也嗚呼作學非
難也繼難也繼非難也知為難也然豈無知者乎晉
湛方生脩學教曰嶺舉雲霞之標澤流清曠之氣山
秀水清荆璞在茲剡山水有之魏曹植孔子廟頌曰
修復舊廟豐其甍宇莘莘學徒爰居爰處王教既備

永作憲矩剡學者圖之

新學記

嵒古剡也剡溪蘊秀異欲罷不能忘杜少陵之詩云爾
夫秀異之氣周流磅礴鍾為人物必有資稟英粹為
時翹楚者其可輕哉變庀職成均日延四方士相與
款語觀其為人有端方者有謹厚者有志氣不羣者
有俊敏可喜者品彙雜然未易枚舉非獨通都大邦
人才之所自出雖僻郡小邑亦未嘗乏人因是思人

才之生何地蔑有今猶古也維古盛時待士類甚厚
長養磨淬不厭不倦良心德性日益著明於是乎皆
為善士隨才器使有功有業即今之士類而以古人
長養磨淬之道與之周旋遲以歲月則亦當有不可
勝用之才豈不甚可貴哉不惟膠庠如是抑郡若縣
之學皆能用是以淑士類承學之流躍然奮發者亦
必多有之茲理甚明任是責者不可不勉四明史侯
之為嵯宰也悼學宮之壞棟撓柱歌岌岌將壓俊秀

朋來肄業無所欲一新之役大而費廣資諸衆力義不可強則以身任之曰事未有不可為者節浮冗窒滲漏裕財之源用由是足主簿徐君愿甚偉茲舉曰此吾所欲為顧力不逮爾議固不合事由是集舊學在城之隈地非爽塏氣鬱不舒周覽以求勝處乃得今地臨流負山面勢宏傑經始於去秋而告具於今春自大成殿至於兩廡重門自明倫堂至於東西齋序自倉庫至於庖湍凡屋百區堅壯軒豁遂成偉觀

而纖芥不擾士業其中雍雍愉愉有雲飛川泳之適
侯及主簿君皆有書來屬變識之變不敢辭侯名安
之字子由太師之孫今丞相之從子生長金玉淵海
之間益自砥礪不溺豪習而留意於學宮如此可謂
知本務矣諸生涵濡教育何以報稱亦惟有志於道
靜觀此心與天地同本與聖賢同類我欲為善誰能
禦之充火然泉達之端謹握苗茅塞之戒更相磨勵
儒風大振則侯之至望也尚勉之哉嘉定八年四月

乙未朝散郎試秘書少監兼國子司業兼國史院編
脩官實錄院檢討官袁燮記

淵源堂孔門像

剡周氏作淵源堂製先聖十哲坐像列畫七十二子為
一堂闕富學輝聲集彥擢秀恢義五齋又有細論堂
蘊秀軒同襟館蘭馨室時永嘉王公十朋居師席台
溫秀士咸在館塾王公記曰孟子曰君子深造之以
道欲其自得之也說者因孟子之言論淵源之學本

乎自得非傳授所能嗚呼是見孟子之言不究孟子
之不必言也夫欲造道於未得之前不資諸師友可
乎必深造而後能自得非孟子有所不能言未有舍
師友而自能深造者此又孟子所不必言也孟子知
性為善知道莫大乎仁義為七篇書其自得有如此
者世之學者多矣自得者鮮父兄之教子弟固非無
師友也命之之意殆不過傳句讀習文詞爾鮮有及
乎道學之淵源望其深造自得可乎周君誠子孫曰

親師友之淵源噫君之家訓過人一等矣慮子若孫懈而弗遵為名其堂且記其事似孫曰家有塾黨有庠古人之教也王公之記其叙若此豈不足以裨風化美習俗乎取以系諸學

進士登科題名

史綸

天聖五年
王堯臣榜

史叔軻

綸之子景祐元
年張唐卿榜

茹約

慶歷二年
楊寘榜

茹開

皇祐五年
鄭解榜

姚勗

嘉祐四年
劉燁榜

史安民

熙寧九年
徐鐸榜

黃特

元祐六年
馬涓榜

求移忠

紹聖元年
畢漸榜

姚舜明

紹聖四年
何昌年榜

求元忠

崇寧二年
霍端友榜

黃唐傑

宣和三年
何煥榜

馬佐

紹興十三年
陳誠之榜

茹紹庭

紹興十五年
劉章榜

周汝士

紹興十八年
王佐榜

茹驥

紹興十八年
王佐榜

周汝能

紹興二十七年
王十朋榜

周之綱

淳熙二年
唐驥榜

唐錡

淳熙二年
唐驥榜

白公焯

淳熙十一年
衛涇榜

石宗萬

淳熙十四年
王容榜

周之瑞

淳熙十四年
王容榜

郭綽

淳熙十四年
王容榜

宋叔壽

紹熙四年
陳亮榜

石宗魏

慶元二年
鄒應龍榜

王復明

慶元五年
魯從龍榜

茹駁

慶元五年
魯從龍榜

石孝溥

慶元五年
魯從龍榜

任必萬

間禧元年
毛自知榜

過文煥

間禧元年
毛自知榜

周之章

嘉定元年鄭
自誠榜上舍

茹或

嘉定四年
趙建大榜

姚鏞

嘉定十年
吳潛榜

周宣子

嘉定十年
吳潛榜

過宋

嘉定十三年
劉渭榜上舍

周溶孫

嘉定十六年
蔣重珍榜

廩

舊在縣西山頭嘉定八年尹史安之移置縣前

驛

驛名訪戴舊在縣左之訪戴坊嘉定八年尹史安之重建於東門之外水行而舟陸行而車皆於此判袂人以為得津喉之要焉

曦雪樓

嘉定八年尹史安之新創出東門在訪戴驛之南下俯清溪前列疊嶂樓之下扁曰剡川一曲

戴溪亭

出南門枕碧溪有戴溪亭佳山清湍芊林古渡蔚茂平
遠盡入臨眺王銓戴溪亭詩碧玉仙壺表裏清我來
閒伴白雲行四山迤邐青圍野一水蜿蜒碧遶城試
問春來觀秀色如何雨後聽寒聲老人飛馭烟霞外
落日空含萬古情又詩天上東風轉斗星天涯羈客
尚飄萍道塗謾經殘歲風雪那堪客旅亭春到怯
添雙鬢白夜寒愁對一燈青絕憐萬古淒涼恨不計

樽前一醉醒王梅溪戴溪亭詩剡水照人碧剡山隨
眼青吾來非雪興暫上戴溪亭尚書芮公輝持憲節
登此亭賦詩溪山之興無時盡興盡名亭意可知出
岫孤雲含細雨投林宿鳥愛深枝風流已是千年事
公案今成七字詩短棹悠然隨所適人生出處要如
斯亭舊名戴溪芮公更為興盡今仍舊名

放生池

出北門半里有亭名恩波亭之前後皆有池

版圖

田為晦三十七萬五千七百三十八廢者為晦八千四百二十今為晦三十六萬七千三百一十有二嘉定以後晦

夏輸上供折帛錢為緡四萬二千四百一十有九和買為絹一萬八千四百五十有一捐其坍失者合輸絹萬有八千二百二十有九紬二百六十有九綿為兩二萬三千一百一十捐其坍失者合輸兩二萬七百

七十有八茶租為緡七百四十小綾二百五十為緡
一千五百四十米為斛二萬四百蠲閣者斛五百有
七合輸斛一萬九千剡田厥上依谿作碓厥中陂池
為利厥下者以雲雨為豐凶其得陂碓者十不能二
三故田事磽薄農人艱難他州豐剡不全熟而又稅
重科濫催督罕經使已納者不復輸合科者不復過
則田磽農難尚庶幾焉

縣郭為戶一千一百九十四為丁一千八百九十五嘉

定以後

鄉落為戶三萬二千為丁五萬六千八百一十八嘉定
以後

兵籍

尉司弓兵一百人

長樂寨兵一百人

管界寨兵一百人

剡錄卷一

欽定四庫全書

剡錄卷二

宋 高似孫 撰

山水志

用酈道元注
水經凡例

剡山為越面縣治府宅其陽北出一峯曰星子峰比他
山稱峻竦岡隴迢遞與星婺脈絡其下曰剡坑清湍
潺潺行竹樹陰坑左右多果卉西為聖潭山深而松
秀中有潭穴泓泓可勺

沃州記曰東南山水越為首
剡為面其山巔屹起一峯上

有浮圖號白塔詩僧仲皎結廬於此曰閑閑庵汝陰
王銍賦詩賀家湖東剡溪曲白塔出林山斷續雪中
興盡酒船空境高地勝何繇俗誰結禪居在上方山
房曲折隨山麓箇中非動亦非靜自是白雲簷下宿
世傳秦始皇東遊使人斷此山以泄氣土坑深千餘
丈號剡坑山王銍有剡坑採梅詩嶺上寒梅自看栽
山斜一半似屏開春寒點點枝頭雨上有東
流水過來坑澗之水清潔可愛又多花果

東為嵯

山山有嵯亭帶山臨江松嶺森鬱沙水平淨

嵯山在東三十

里水經曰山上有亭亭帶山臨江松嶺森鬱沙水平淨

又東為輦山山勢平整

如設莞簟有白巖龍祠碧潭淵淵用干霖雨其下衆

流趨導湍石汎激浮險四注

在東三十一里有白巖神祠并龍潭祈禱輒驗

舊經曰山遙望之如鋪簞

又東有四明山千岡萬崖巍與天敵陽

巖陰嶂怪跡可稽有謝遺塵居

在東一十里高二百一十丈周圍二百一

十里又綿亘上虞餘姚間會稽地記曰四明山高峰
軼日雲岫蔽天梅福四明山記曰四明山境四周圍
八百餘里內通八百餘家居之其山四面形勢各有
區分東為驚浪之山西拒奔牛之壑南則驅羊之勢
北起走蛇之峭其中通一溪曰葦溪東面七十峰號
驚浪山其境接句章東為句章之地西面山狀如奔
牛山中有五峰形如芙蓉號芙蓉峰正是四明山之
心其峰有巖及石壁二峰生五種之芝自然花藥南
七十峰狀如驅羊號驅羊峰其地宛轉吐出清澗有
七峰甚奇一澗出南過一百二十里其水歸鄞江南
源是四明山南門也其溪號為白溪西南有八峰如
會囊號八囊山向北有兩山如走蛇山足澗深七十

餘里是四明之北門梅福四明山記四明山四面二百八十峰周圍八百餘里山內生銀蘭香草藥石乳梓松栢檉黃楊茗樹石燕毛竹銀筍不死之鹽孫綽天台賦曰涉海則有方丈蓬萊登陸則有四明天台皮日休詩穴間有真宰四遠見蒼崖山中有九題者謝遺塵所居也張士遜送高學士如越詩山影四明接溪聲萬壑流彭汝礪送越帥程公闢詩一水北鄰千里海萬峰南揖四明山絕東為三峯

山其陰與鄞之雪竇山接岡嶺敷亘澗道奔流又有

南山黃山與白石三山秀拔卓立

水經曰東有篔簹山又南有黃山與白

石三山為縣之秀峯

又東為石鼓山山有祠所謂石鼓者人踐

馬石輒響答

東五十里有石鼓神祠沃洲記曰北對四明而金庭石鼓介焉諸暨縣亦有石

鼓山 又有動石山山下通臨溪溪中巨石數百磊磊天

欲雨石必先動山剡深潭以宅龍物

東五十里

又東為丹

池山積翠縹緲雲霞所興神仙之宮也池有水赤色

勺之潔白

縣東七十二里舊桐栢山唐天寶六載改為丹池道經曰上有桐栢合生下有丹池

赤水南岳真人曰越有桐栢金庭與四明天台相連神仙之宮也真誥曰桐栢山高一萬五千丈周圍八

百里四面視之如一其一頭在會稽東海際其一頭入海中是金庭不死之鄉在桐栢之中方四十里上有黃雲覆之樹則蘇紆珠碧泉則石髓金精其山臺盡五色金也經丹水而行有洞天從中過在剡臨海

三縣之境是為金庭洞天晉右軍羲之居焉墨池書樓遺

雅不絕

金庭洞天台華頂之東門也名山洞天記曰二十七洞曰金庭周圍三百里名金庭崇妙

之天在剡縣唐裴通記曰剡中山水之奇麗金庭洞天也按上清經洞天在天台桐栢山中方四十里其北門在此小香爐峯頂人莫見之又曰晉王右軍家於此山書樓墨池舊制仍在南齊道士褚伯玉於此置金庭觀乃其南為刻石山山舊有衛夫人碑山之右軍之家也

半有巨井井有蛟

南三十里十道志曰一名穿山相傳以刻石為名不知文字所在昇

明末縣人倪襲祖行獵見山上有文凡三處苔生其上刮苔視之其大石文曰黃天皇蕭字道成得賢師天下太平舊經曰或言衛夫人碑墮此中因以然刻為名唐寶歷元年觀察使元稹使人訪碑不獲

山水之奇深重複皆聚乎西其西曰太白山小白山

峻極崔巍吐雲含景趙廣信所仙也雙石笋對立如

闕有趙廣信丹井

廣信鍊九華丹於此山側刻水在山之陽

瀑泉怒飛清

波崖谷稱瀑布嶺

嶺中產仙茗

宋褚伯玉嘗隱茲峰

西六十里

夏侯魯先地志曰峻極崔嵬吐雲含景與小白山接趙廣信於此山煉九華丹真誥曰趙廣信陽城人魏

末渡江來此山師李一成服烝法又授師左君守元中之道徹視五藏或入城市賣藥莫知其年歲後白日升

天山有白猿赤獾又有鳥似鷄文彩五色口吐綠綬長數尺號吐綬雙石笋各長五六丈對立如闕瀑泉

飛下號瀑布嶺土人亦稱西白山按宋書褚伯玉隱身求志居剡縣瀑布山三十餘載揚州辟議曹從事

皆不就齊高帝為之築太平館華鎮瀑布嶺詩序曰在嵎縣西六十里福善所集蔚有靈氣者產仙茗寰

宇記曰瀑布嶺屬餘姚
蓋此山聯接餘姚縣界
在東白山立嘯猿亭
仲皎題
東白山

嘯猿亭詩放意在雲表飄然更自由
掛烟羣木冷啼
月一山秋裊裊清風裏淒淒碧澗頭
三聲融妙聽行

客若為愁
又流山軒
仲皎題東白山軒詩竹外泉聲急松
心月色寒人間推曠絕只自倚欄干

在西白山有一禪師道場二禪師道場
仲皎遊西白
山一禪師二

禪師道場詩勝境東西白高僧一二禪
只知行道處
不記住山年澗月平分照林花各自妍
披雲尋舊趾

猶在絳峰邊
作齊雲閣
仲皎題西白山齊雲閣詩山雲吹
斷路頭開此處疑穿月脇來怪底

行人看碧落笑
築庵居
仲皎西白山觀雪詩西白名
山處那堪踏雪看四圍銀世

界一色玉峰巒夜色和天冷晴暉放
月寒溪梅初一
二著意為渠看
又詩啼切孤猿曉更哀柴門半掩白

雲來山童問我歸何晚昨夜梅花一半開又詩無地
卓錫生計難且空雙手到林間猥隨碧水占明月堅
打白雲賒好山巖石空邊依草舍藤蘿低處
看松闕年來老去知何許合向人間占斷閑 又為鹿

苑山山有葛仙翁祠祠下有二石甕蹲峙石崖壁立

懸瀑十數丈下注石穴匯為龍潭

鹿苑寺西源出水
巔二小穴石湧流

至葛仙翁祠下出二石甕間又一里許石崖壁立瀑
布十餘丈下瀦為潭頃歲旱投符潭內水石有聲俄
頃水盡黑電自潭
發雨驟至如響 又西為五龍山又曰烏豬山重岡

復嶺峯壑蟬聯老木虬松青翁失日水自真如山其
來迢迢或奔或匯為靈潭者五龍抱雲雨又西北為

葛峴山

西北二十里

高僧竺法崇居焉孔淳之訪之信宿

不去又西曰響巖雲雨奮作巖輒有聲巖亦有神龍

井

縣西山有龍潭

石門山

縣西山有龍潭下有沸水在溪穴間周二三尺如湯沸滾滾四時不

休然水流潭

貴門山

縣西有細嶺山有三懸潭山下有普濟龍祠給事李易有詩雲

嘯分佳茗風潭轟怪松書疑黃石投稅可紫芝供抵玉那驚鶴探珠欲近龍晚來聽盡雨乞水濯塵容又

軍騎侵淮海龍潭路始通雲生依寶刹月出現珠宮瀉澗泉噴薄衣巖樹鬱蔥神交難獨擅吾黨契元功

又題龍潭壁詩貴門今是鹿門山盡室扶攜萬壑間流水相隨真自悟遙岑一望若為攀風翻竹塢清如

洗月過松扉靜不闕潭底卧其山崖嶂干雲叢叢森龍煩一起正須霖雨濟塵寰

錯老蝙蝠如鷓鴣亂飛

絕西為仙巖山峭矗峰入天一峰尤卓立其餘諸山皆削峻增

壁立萬仞佳木老樹陰翳森挺山有石洞有仙人跡可受數人又有三泉迸出石穴不假斤鑿渾然天成

有龍居之

其東北曰了山山有餘糧嶺

東北十二里有餘糧嶺產禹餘糧又

有禹祠

其北有謝巖山

北十五里山有謝仙君祠

康樂所遊也山隩

深峭被以榛箭有巨澗奔激清湍崩石映帶左右入

於溪下為三墜嶺下視深川紺碧一色又北曰舜皇

山山最崇真竄岡嶺複深有舜井焉又北曰嶧山兩岸

峻壁乘高臨水深林茂竹表裏輝映其間傾澗懷烟

泉溪引霧吹睦風馨觸岫延賞

縣北四十四里輿地志曰自上虞七十里

至溪口從溪口至江上數十里兩岸峻壁乘高臨水深林茂竹表裏輝映名為嶂嶻磧瀨迅湍以至剡也水經曰嶂山與嶧山接其間傾澗懷烟泉溪引霧吹睦風馨觸岫延賞王元琳謂之神明境界事見謝康樂山居記水經注曰嶂山山嶠壁立臨江歌路狹不得併行行者牽木梢進不敢俯視西有一孤峰飛禽罕至山嶺頂樹下有十二方石池甚光潔嘗有採藥者說山見通溪至此還復更尋遂迷前路

又北

有石牀謝靈運所垂釣也其下為剡溪口水深而清

曰嶂浦

潘閻晚泊嶂浦寄剡縣劉員外賦詩曉泛剡溪水晚見剡溪山徘徊駐行棹待月思再還

漁唱深潭上鳥棲高樹間
應當金石友念我無暫間

又東北曰車騎山謝玄之

居也右濱長江左傍連山平陵脩通澄湖遠鏡於江

曲起樓樓側悉是桐梓森聳可愛號桐亭樓

舊經曰
晉車騎

將軍謝玄為會稽內史嘗於北山立樓居止後人因
以為名水經曰嶧山東北太康湖謝玄舊居右濱長
江左傍連山平陵脩通澄湖遠鏡於湖曲起樓樓側
悉是桐梓森聳可愛號桐亭樓山中有三精舍高甍
凌虛垂簷帶空俯眺平林烟杳在下水陸寧晏足為
避地之鄉江有琵琶圻圻有古塚墮水甍有隱起字
云筮吉龜凶八百年落江中謝靈運取甍詣京師咸
傳觀焉舊經引謝靈運經此有詩云曩趾即先築故
池不更穿果木有舊行壤石無遠延按此詩康樂還
舊園作贈顏延年自注即始寧園也始寧今上虞縣
有西莊別墅存焉然
舊經載於此未攷

剡以溪有聲清川北注下與江接

樂史寰宇記曰在縣南一百五十步

其

水合山流為溪殆如顧凱之所謂萬壑爭流者其源

有四一自天台山北流會於新昌入於溪一自婺之

武義西南流經東陽復東流與北流之水會於南門

入於溪其一導鄞之奉化由沙溪西南轉北至杜潭

入於溪一自台之寧海歷三坑西繞為三十六渡與

杜潭會出浦口入於溪合四流為一入於江舒元與

弔谿藤文謂剡溪上縣四五百里則未考也會稽郡

記曰會稽境特多名山水潭壑鏡澈清流灌注惟剡
溪有之王子敬云從山陰道上行山川自相映發使
人應接不暇若秋冬之際尤難為懷子敬所云豈惟

山陰特剡溪又過耳

元和郡國志曰溪出縣西南北流入上虞為江

是溪也

朱放謂之剡江詩曰月上沃洲山上人歸剡縣江邊

李端謂之戴家溪詩曰戴家溪北住雪後去相尋方

干謂之戴灣詩曰戴灣衝瀨片帆風高枕微吟到剡

中陸龜蒙謂之剡汀詩曰歸鴻吳島盡殘雪剡汀銷林檎

謂之岷水詩曰溪連岷水興何盡路接仙源人自迷

齊唐謂之戴逵灘詩曰春樹深藏嶂浦笛夜猿孤響

戴逵灘自上虞江七十里至溪口

輿地記曰上虞七
十里至溪口張籍

詩所謂春雲剡溪口殘月鏡湖西陸經詩
落帆直向剡谿口入境先登天姥山是也溪口為嶂

浦蒼崖壁立下東清流深者為淵潭淺者為灘磧有

山磐跣下臨清深是為長官祠

一曰嶂
浦廟

祠下為嶂潭

水多巨魚漁人蘆子所藏集

自嶂浦十里至榭樹五
里至黃沙五里至強口

八里至了溪傍為故港八里至浦口四里至竹山五
里至吳家莊十里至戴溪亭二十里至蛟井七里至

桃源二十里至大明寺二十里至皇覺寺晉王子猷
居山陰夜雪初霽四望皓然獨酌酒咏左思招隱詩
忽憶戴逵遠時在剡便乘小舟詣之造門不前而返
曰本乘興而行盡興而返何必見安道耶李太白詩
曰試問剡溪道東南皆越鄉舟從廣陵去水入會稽
長杜甫詩剡溪蘊秀異天姥引歸帆劉長卿詩曰鳥
道通閩嶺山光落剡溪朱放詩曰月在沃洲山上人
行剡縣溪邊李端詩曰興來空憶戴不似剡溪時戴
叔倫詩曰心知剡溪路聊且寄前期又曰那能有餘
興不作剡溪尋戎昱詩曰心繫征帆上隨君到剡溪
賈島詩曰何當掃松葉拂石剡溪陰

溪得雨易漲涉晴易涸而為淵潭
者輒聚沙成磧為立行者又復為大淵渟不止高岸
可谷深谷可陵亦幾於蓬萊清淺幾見桑田矣其曰

了溪者推禹功也

東北五里源出了山舊經曰禹鑿了溪人方宅土王銓僧湛然了溪

詩序曰水逆行謂之洚水今浙江之潮逆行之水也禹因三江入海順水性自然處以告成功故剡溪謂

之了又有東渡西渡南渡水經曰江水翼縣轉注故溪有東渡西渡焉南渡通臨

海並汎單船為浮航西渡通東陽併二十五船為橋航王性之有雪後渡西溪詩雪後孤村一段烟晴光

遠照玉山川酒旗隔步招其以水利著者曰黃塘北

閑客獨上西溪渡口船廣利塘西三十里有小池

里漢塘北二十新塘西三里甚遠人言與塘通塘水灌溉或竭而小池其以湖稱

水為減塘水採漁或渾則小池水為之渾曰愛湖南三曰東湖西湖西三東湖瀰漫兩旁蔭以

長松殊有爽氣



別錄卷二

欽定四庫全書

史部

剡錄卷三至
六下

詳校官監察御史臣沈孫璉

檢討臣德生覆勘

總校官進士臣繆琪

校對官助教臣胡子襄

謄錄舉人臣鍾廷瑛

欽定四庫全書

剡錄卷三

宋高似孫撰

先賢傳

謝承作會稽先賢傳鍾離岫作會稽後賢傳今做此作傳唐修晉史凡晉人士奇辭逸語

往往刊落知者惜之今取諸晉雜史庶於晉人風度有所載焉

人士

戴逵字安道譙國人居剡祖頌父綏並有名位逵有清操性高潔不樂當世以琴書自娛善圖畫巧丹青為

文綺藻常以禮度自處深以放達為非年十餘歲在
瓦官寺畫王長史見之曰此童非徒能畫亦終當致
名恨吾老不見其盛時耳孝武時以散騎侍郎國子
博士累召辭父疾不就郡縣敦逼不已乃逃於吳會
稽內史謝幼度慮其遠遁不反上疏請絕其召命帝
許之遠還剡召之復不至吳國內史王珣有館在虎
丘山乃潛往珣山中謝玄王珣並表遠焉謝太傅本
輕遠見但與論琴書遠既無吝色而談琴書愈妙謝

悠然知其量

晉安帝紀曰達有清操性甚快暢泰於娛生好鼓琴善屬文尤樂遊讌常與高

門風流者遊談許其通隱屢辭徵命遂著高尚之稱遠既厲操東山而其兄逮

欲建式遏之功

戴氏譜曰逮字安直譙國人祖碩父綏有名位逮以武勇顯有功封廣陵

侯仕至大司農

謝曰卿兄弟志業何其太殊逮曰下官不堪

其憂家弟不改其樂

謝敷字慶緒會稽人澄靖寡欲入太平山十餘年以母

老還南山若耶中內史郝愔表之徵博士不就嘗於

剡中造風林寺敷崇信釋氏以長齋為業初月犯少

微少微一名處士星占者以隱士當之戴安道有美才時人惜之俄而敷死會稽士人嘲曰吳中高士求死不得死

郝超字景興高平人司空愔之子也少卓犖不羈有曠世度累遷中書郎司徒左長史超每聞欲高尚隱退者輒為辦百萬資並為造立居宇在剡為戴公起宅甚精整戴始往舊居與所親書曰近至剡如官舍

謝奕作剡令

中興書曰謝奕字無奕陳郡夏人祖衡太子少傅父袁吏部尚書奕少有器鑒辟太

尉掾剡令累遷豫州刺史

有一老翁犯法謝以醇酒罰之乃至過醉而猶未已太傅時年七八歲著青布袴在兄膝邊坐諫曰阿兄老翁可念何可作此奕於是改容曰阿奴欲放去耶遂遣去

李宏度常歎不被遇

中興書曰李充字宏度江夏鄂人也祖康父矩皆有美名充初辟丞

相掾記室參軍以貧求剡縣遷大著作中書郎

殷揚州知其家貧問君能屈

志百里否李答曰北門之歎久已上聞窮猿奔林豈

暇擇木遂授剡縣

戴敦字長雲安道子也為散騎常侍與顥並高蹈俗外
三葉肥遁世稱清風家盈素氣故使箕頰重輝夷皓
疊跡為海內所稱焉前後辟命不就

出吳地記

戴顥字仲若安道子也剡多名山故世居剡下與兄並
受琴於父父沒所傳之聲不忍復奏各造新弄兄制
五部顥制十五部顥又制長弄一部並傳於世桐廬
縣又多名山復共遊之因留居止兄卒顥以桐廬僻
遠難養疾出居吳下吳下士人共為築室聚石引水

植林開澗乃述莊周大旨逍遙論釋禮記中庸篇元
嘉中召不就止京口黃鵠山北竹林精舍宋文帝每
欲見之常謂黃門侍郎張敷曰吾東巡之日當宴戴

公山下也卒年六十四

出沈約
宋書

阮裕字思曠陳留尉氏人祖輅齊國內史父顗汝南太

守少有德行

出中興書

淹通有理識居會稽剡縣志尚肥

遁

出阮裕
別傳

在東山蕭然無事常內足於懷

出世說

除東

陽太守徵侍中皆不就有以問王逸少逸少曰此公

不驚寵辱雖古之沈冥何以過此劉真長曰我入東
正當泊安石渚下耳不敢復近思曠傍在東山終日

靜默無所脩綜而物自宗焉卒葬剡山

出晉書

阮瞻字彥倫裕長子仕至州主簿

出阮氏譜

阮萬齡裕之孫少知名家在剡縣頗有素情宋永初末

自侍中解職東歸

王羲之字逸少司徒導從子也家世貧約恬暢樂道未

嘗以風塵經懷

出王導別傳

祖正尚書郎父曠淮南太守

元帝之過江也曠創其議羲之有英譽風骨清舉

出晉

安帝記

高爽有風氣不類常流

出宋文帝文章志

朝廷公卿皆

竒其才器為右軍將軍會稽內史初渡浙江便有終
焉之志時孫興公與支道林共載往逸少因論莊子
逍遙遊作數千言才藻新奇逸少披襟留連不能已

出世說

慕會稽佳山水名遂居焉剡金庭觀稱右軍故

宅有書樓墨池

徽之字子猷羲之子性卓犖不羈

出晉中興書

為大司馬桓

溫參軍溫曰卿在府久此當相斷理初不答以手板

挂頰云西山朝來致有爽氣

出世說

嘗居山陰夜雪初

霽月色清朗四望皓然獨酌酒詠左思招隱忽憶戴

逵逵時在剡便夜乘小舟訪之經宿方至造門不前

而返人問其故徽之曰本乘興而行盡興而返何必

見安道耶子敬與子猷書道兄蕭索寡會遇酒則

酣暢忘反乃自可矜

謝玄字幼度與從兄朗俱為叔父安所器重轉征西將軍

苻堅入寇朝廷求文武良將安以玄應舉郗超歎曰
玄不負所舉吾嘗見其使才雖履屐間亦得其任於是
徵拜建武將軍監江北諸軍事大破苻堅遂經畧舊
都加都督七州會翟遼張願叛玄上疏送節盡求解
所職又以疾辭授散騎常侍會稽內史玄輿疾之郡
居嶠山東北太康湖江曲起樓樓側桐梓森挺又號
桐亭出鄞道元水經注卒葬始寧有文集十卷三子曜宏微
皆歷顯位

王洽字敬和導諸子中最知名與荀羨俱有美稱歷散騎中書郎又加中書令穆帝詔書稱其清裁嘗遊剡

出白居易
沃洲記

劉恢字道生沛國人識局明濟有文武才王濛每稱其思理淹通蕃屏高選為車騎司馬年三十六卒贈前

將軍

出宋明帝
文字志

嘗入剡

出沃
洲記

許詢字元度高陽人有才藻善屬文

出續晉
陽秋

與孫興公

皆一時名流

出世
說

俱有負俗之談卒不降志

出文
章志能

清言於時人士皆欽慕仰愛之

出晉中興書

劉尹云清風

朗月輒思元度

出世說

父暉晉元帝渡江遷會稽內史

因居焉

許氏譜曰元度母華軼女

詢隱不仕名為朝議郎不就築

室永興縣西山蕭然自致乃號其岫曰蕭然山

楊巨源詩

許詢本愛交禪侶陳實由來是好兒
耿緯詩許詢清論重寂寞住山陰野客接寒寺
閑門當古林海日秋熟早湖水晚漁深世上窮通理誰能奈此心

入剡山莫知所止或以為昇

仙

出晉中興書

殷融陳郡人歷太常吏部尚書仲堪其子也有才操仲

堪子曠之為剡令有父風時融病虛悸聞床下蟻鬪

謂是牛鬪曾遊剡

出沃洲記

孫綽字興公家會稽博涉經史

出文章志

與兄統為文選言

簡章清綺絕倫

出續文章志

綽游放山水十有餘年作遂

初賦以致其意游剡中

出沃洲記

王濛字仲祖太原晉陽人濛神氣清超放邁不羣檢尚

雅正外絕榮競辟司徒掾中書郎

出王長史別傳

嘗游剡焉

何充字次道廬江人思韻淹通有文章才情累遷會稽

內史侍中揚州刺史

出晉陽秋

嘗入剡

出沃洲記

王坦之字文度述之子與郝超俱有重名歷散騎常侍

大司馬嘗游剡

出沃洲記

臨死與謝安桓冲書不及私唯

憂國家事

謝朗字長度安次兄據之長子文義艷發名亞於玄仕

至東陽太守

出晉陽秋

嘗至剡中

出沃洲記

謝太傅寒雪內集

俄而雪驟公欣然曰白雪紛紛何所似兄子胡兒曰

胡兒朗小字也

撒鹽空中差可擬兄女曰未若柳絮因風起

公大笑樂兄女即大兄無奕女左將軍王凝之妻也

婦人集曰道蘊有文才
所著詩賦誄頌傳於世

袁宏字彥伯陳郡人謝安賞宏機捷辯速自吏部郎出

為東陽郡祖於冶亭時賢皆集安欲卒迫試之執手

將別顧左右取一扇而贈之宏應聲答曰輒當奉揚

仁風慰彼黎庶合坐歎其要捷

出晉陽秋

嘗入剡

出沃洲記

彪

有逸才文章絕麗曾為詠史詩是其風情所寄

王脩字敬仁太原晉陽人父仲祖也脩明秀有美稱為

著作佐郎琅琊王文學轉中軍司馬未拜而卒時年

二十四王弼之沒與脩同年脩弟熙歎曰無愧於古

人而年與之齊也曾入剡

出沃洲記

謝萬字萬石太傅安弟也才氣高俊蚤知名歷吏部中

郎將豫州刺史散騎常侍

出中興書

嘗入剡

出沃洲記

萬善屬

文能談論為八賢論謂漁父屈原季主賈誼楚老龔

勝孫登嵇康也

出中興書

蔡系字子叔濟陽人司徒謨第二子有文理仕至撫軍

長史

出晉中興書

嘗曰韓康伯雖無骨幹亦自膚立嘗入

剡

出沃洲記

孔淳之字彥深魯人少有高尚居剡性好山水每有所

遊必窮幽峻或旬日忘歸嘗遇桑門披衿領契自以

為得意之交

出王智深宋記

與戴顓王宏之敬宏等共為人

外之游會稽太守謝方明苦要之不能致使謂曰苟

不入吾郡何為入吾郭淳之笑曰潛游者不識其水

巢棲者不辨其林飛沈所至何問其主終不肯往茅

室蓬戶庭草蕪徑唯牀上有數帙書

出沈約宋書

元嘉初

徵為散騎侍郎乃逃於上虞界中家人莫知所在

謝靈運陳郡陽夏人移籍會稽幼聰慧善屬文舉筆立

成文章之盛獨絕當時

出文選人名錄

襲封康樂遷秘書丞

出為臨海太守及經山陰防禦

出元嘉起居注

郡有各山水

靈運素所愛好遂肆意游遨父祖並葬始寧有宅墅

脩營舊業傍山帶江盡幽居之美嘗入剡有詩曰旦

發清溪陰暝投剡中宿

孔稚珪字德璋山陰人早立名譽風韻清疎好文詠當時名士陸慧曉謝淪張融何點沈淵相與為君子之交盛營山水不樂世務徵侍中不行又拜詹事嘗入剡從褚伯玉授道伯玉死稚珪為於太平館立碑

張嵎稷之子稷初為剡令至嵎亭生子因名嵎字四山嵎雅有志操能清言起家祕書郎累遷湘東王長史王暉日元言因為之筮得節卦謂嵎曰卿後當東入為郡恐不得終嵎曰貴得其所耳還為大府卿吳興

太守侯景圍建鄴率兵赴援授岷征東將軍岷曰天子蒙塵何情復受榮號賊行臺劉神茂攻破義興遣使說岷斬其使遣軍破神茂侯景遣其中軍侯子鑒助神茂擊岷軍敗死節元帝追贈侍中開府儀同

三司謚忠貞

朱士明剡人齊舉茂才梁天監初授儒林博士除吏部尚書封漢昌侯

賀知章字季真越永興人性曠夷姑子陸象先曰季真

清譚風流一日不見則鄙吝生矣肅宗為太子遷賓
客拜祕書監知章晚節誕放號四明狂客祕書外監
天寶初病夢遊帝居請為道士還鄉以宅為千秋觀
帝賦詩乞鏡湖剡川一曲賜之

秦系字公緒越州會稽人有詩名天寶間避地剡川作

麗句亭郡守改其居曰秦君里

出秦隱君詩序

北都留守薛

兼訓奏為右衛率府倉曹參軍不就建中初結廬於

泉南九日山穴石為研注老子

系詩曰終當避世
喧自注五千言

刺

史薛播數往見之張建封聞不可致請就加校書郎

系寄建封詩曰少是烟霞客潭深得釣魚不知芸閣上還校幾多書姜公輔以言忤德

宗為州別駕築室鄰系而居焉貞元七年東度秣陵
年八十餘泉南人思之號其山為高士峯有詩一卷

李紳字公垂中書令李敬元孫少孤游剡上龍宮寺老

僧脩真曰後當領鎮此道幸願建飾吾寺

出紳所作龍宮寺碑

踰二紀紳自宣武節度歷左散騎越州刺史仍一新

舊遊之地賦詩以紀其事又刻碑

齊抗字遐舉定州義豐人拜中書門下平章事昔遊越

鄉闕翫山水者垂三十載初棲於剡嶺後遷於玉笥

自解辟此山末二紀而登台鉉

出陳諫登石傘峯詩序似孫喜藏齊相拜

平章
時誥

孝行

齊公孫僧達剡人也治父喪至孝事母及伯父謹節名

聞郡縣建元三年表列僧達等二十三人詔表閭闔

賦

齊韓靈敏剡人早孤與兄靈珍並有孝性母亡無以營奉共種瓜半畝朝採瓜子暮已復生遂辦葬焉會靈珍亡無子有妻守節靈敏事之如母

剡縣小兒年八歲與母俱病赤斑母死家人不令兒知兒疑問之曰母嘗數問我病今不復問何也因自投牀扶匐至母屍側頓絕而死

陳王知元居剡丁父喪哀毀卒高宗改孝家里

鄭僧保剡人居父母喪廬墓側十載芝草生於墓甘露

降松栢

列女

公孫夫人姓公孫氏會稽剡人資三靈之淳懿誕華宗
之澄粹竒朗照於韶亂四教成於弱笄慈恩溫恭行
有秋霜之潔祇心制節性同青春之和敦悅憲章動
遵規禮居室則道齊師氏有行則德配女儀禮服有
盈籩豆無闕贊曰猗歟夫人天姿特挺行高冰潔操
與霜整性揚蘭芳德振玉穎猗彼瓊林竒翰有集展

彼碩媛含德來緝動與禮遊靜以義立

出晉潘鈕母
孫氏所作序

贊

仙道

劉晨阮肇剡縣人漢明帝永平十五年采藥於天台山
望山頭有一桃樹取食之又流水中有胡麻飯屑二
人相謂曰去人不遠因過水深四尺許行一里又度
一山出大溪見二女顏容絕妙便喚劉阮姓名問郎
來何晚也館服精華東西帷幔寶絡左右盡青衣下

胡麻飯山羊脯設甘酒歌調作樂日暮止宿住半年
天氣和適常如二三月鳥鳴悲慘求歸甚切女喚諸
仙女歌吹送還鄉鄉中怪異驗得七代子孫傳聞祖

翁入山不知何在太康八年失二公所在

剡有桃源在縣三里

舊經曰劉阮入天台遇仙此其居也林槩越中詩繡被歌殘人竟遠桃花源靜客忘歸

葛洪字稚川仙翁從孫好神仙導養仙翁以丹授弟子
鄭君稚川就鄭君得之咸和初選散騎常侍辭以交
阯出丹砂求為勾漏令鍊丹羅浮山卒年八十一顏

如玉體柔軟舉尸入棺但遺空衣上虞蘭芎山稚川

所棲也

出輿地志盧綸詩城闕望烟霞常悲仙路賒寧知樵子徑得到葛洪家曹唐詩最愛葛洪

尋藥處露花
玉蕊滿山春

剡有仙翁丹井石梯釣魚臺稚川亦至

焉

褚伯玉字元璩錢塘人少有隱操年十八父為之婚婦

入前門伯玉出自後門往居剡瀑布山隔絕人物王

僧達為吳郡寧朔將軍丘彌孫與僧達書曰褚先生

滅影雲棲抗高木食非折節好士何以致之

出蕭子顯齊書

以禮招致伯玉不得已停郡信宿纔交數言而退宋
孝建二年召聘不就齊高帝即位手詔吳會二郡以
禮迎遣辭疾而歸敕於剡白石山立太平館舍之孔
稚珪從其授道為於館立碑卒年八十六常居一樓
仍葬樓所

趙廣信陽城人魏末入剡小白山受李成服炁法又受
師左君守元中之道內見五藏徹視法七八十年賣
藥人間作九華丹或曰白日登天山中有趙廣信丹

井

孫韜字文藏會稽剡人入山師潘四明參受真法陶隱
居手為題握中祕訣門人罕能見唯傳韜與相闔二

人

出真
誥

顧歡字景怡隱剡山好服食弟子鮑靈緩門前樹六十
圍精怪數見歡叩樹即枯山陰白石村多邪病為講
老子皆愈又有病邪者歡問其家有孝經否歡令取
仲尼居一章置枕邊而愈齊高帝輔政徵揚州主簿

踐祚乃至稱山谷臣進政綱一卷優詔稱美東歸賜

麈尾素琴

上虞江岸有顧墅俗傳顧歡問學之所

吳筠字貞節華陰人通經誼美文辭舉進士不中去居南陽山天寶初召至京師南游天台觀滄海與有名士相娛樂文辭傳京師明皇遣使召見大同殿與語甚悅勅待詔翰林獻元綱三篇帝嘗問道對曰深於道者無如老子五千言復問神仙治鍊法對曰此野人事積歲月求之非人主宜留意未幾漁陽事作乃

復東入會稽剡中

高僧

白道猷羅漢僧來自西天竺居沃洲山

白居易沃洲山記曰道猷肇開

茲竺道壹在若耶山道猷以詩寄之

連峯數十里脩林帶平津茅茨

隱不見鷄鳴知有人閑步踐其徑處處見遺薪始知百世下猶有上皇民聞此無事跡以待竦俗賓長嘯自林際歸此保天真壹得詩欣然往訪之上虞有白道猷巖嘗結庵於此江公亮詩好是道人巖畔月夜深清照

飲猿溪

天台山水清險前有石橋迥不盈尺長數十

丈下臨絕冥忘其身然後能濟師梯巖壁捫蘿葛前

山蔚然綺秀雙嶺入天有瓊臺玉閣道猷過此獲紫

芝靈藥

出啓蒙
記注

竺潛字法深隱剡山學義淵博名聲早著宏道法師也

出庾法暢
人物論

晉哀帝兩使禮致之既至簡文尤師敬劉

恢嘲之曰道人亦遊朱門乎潛曰君自見朱門貧道

以為蓬戶耳還山支遁求買沃洲小嶺潛公曰欲來

當給不聞巢由買山隱也遁得深公之言慙德而已

世說作因人就深公買岬山舊經曰東岬山在新昌
縣東四十里石林避暑錄曰高僧傳畧載孫綽道賢

論以當時七僧比七賢竺法護比山巨源帛法祖比
嵇叔夜竺法乘比王濬冲竺法深比劉伯倫支道林
比向子期竺法蘭比阮嗣宗于道邃比阮仲容各以
名迹相類者為配惜不見全文世說晉人本超逸更
能以佛理佐之宜其高勝不凡但恨是時未有經文
傳者亦未廣猶以老莊為宗竺法深賢於王氏諸人
遠矣即支遁求買沃洲報曰未聞巢由買山而隱者
適猶輸此一著想見其人物也皇甫冉詩高人本姓
竺開士舊名林一入春山裏千峰不可尋秦系詩松
間儻許幽人住更不將錢買沃洲棲台詩荒齋增暑
夢數夕罷冥搜南海高僧問西園獨鶴愁興生黃竹
晚吟斷碧雲秋共是忘機者何當卧沃洲清晝詩憶
若南適越不作買山期劉長卿
詩沃洲能共隱不用道林錢

支遁字道林

高逸沙門傳曰遁姓關氏
河內林慮人或曰陳留人

神心警悟清識

玄理任心獨往風期高亮沈思道行冷然獨暢

出支
適別

傳

又幼有神理聰明透澈

出支
適傳

王濛重之曰造微之

功不減輔嗣羲之在會稽與交住靈嘉寺入沃洲小

嶺建精舍

盧象詩元度常稱支道林高人隱處白雲
深一去人間長不見千峯萬壑樹森森

至山陰講維摩許詢為都講賓主之辯相尋無窮

世說

曰諸人士及林法師在會稽西寺講王荀子
在馬許掾使往西寺與王論理共決優劣

又在白

馬寺中將馮太常共語逍遙支卓然標致理於二家

之表

馮氏譜曰馮懷長樂人歷太常護軍將陸龜蒙
詩何時更問逍遙義五粒松陰拂石牀注曰道

林有道
遙義

有遺馬者受之曰吾愛其神駿

山有放馬坡
在縣東三十

里有餉鶴者曰凌霄之姿何肯與人作耳目近玩養

翮成使飛去

世說曰支公好鶴
在岫山有放鶴峯

每名辰至餘姚塢曰

昔來就見安石輒移旬日今觸情是愁耳歿葬塢中

舊經曰塢在餘姚縣西南十二里僧史曰適經餘姚塢信宿彌日不去或問其意曰若安石相從未嘗不移旬今觸目是愁耳乃移塢中永和元年閏四月四日沒葬塢中世說曰墓在石城戴安道過其墓歎曰德音未遠而拱木已積蓋神理綿綿不與氣運俱盡耳出建康實錄

有文集八卷

集中有即

色諭
高妙

乾興洲支道開威蘊室寶光識斐藏濟度逞印

自威至印一字

為一僧與白道猷竺法潛支道林乾興洲支道開凡十八僧皆居沃洲山出沃洲山記

支曇蘭晉太元中游剡縣後憇赤城

高僧傳

竺曇猷燉煌人少苦行習結禪定游江左止剡之石城

山有神現形詣猷曰師威德既重來止此山弟子輒

推室相奉天台山懸崖峻峙峯嶺侵天上有釋舍得

道者居之有石橋跨澗而橫石斷之自終古以來無

得至者猷行至橋所聞空中聲曰知君誠篤今來相

度後十日當得住此矣

竺法崇有律學精法華經居剡葛峴山茅茨澗飲孔淳
之訪之信宿不去神思傾豁

曇斐會稽剡人棄家事慧基善莊老儒墨之書攷究經
典疑義還居法華臺寺衡陽孝王元簡廬江阿師事
之張融周顒從其遊

僧護會稽剡人住石城山隱岳寺寺北有青壁千餘尺
護每至其下輒聞管弦聲或發光怪即發誓就壁鐫

十丈佛像齊建武中用工經年纔成面像俄卧疾臨終誓曰再生當就吾志

僧祐剡人作石像祐授其準式先是建安王聞僧護所造石像上奏詔祐董其事天監五十年成舊說祐護前身也

靈澈字澄源會稽湯氏子風儀甚雅談笑多味雖受經論心好篇章

出劉禹錫詩序

語甚平易如不出常境而諸生

思慮終不可至

出權德輿送行序

從嚴維學詩抵吳興與皎

然游後自廬山入剡歸沃洲

刻錄卷三

欽定四庫全書

剡錄卷四

宋 高似孫 撰

古竒跡

舜井

井二在舜皇山井中有蛇生角今為沙土所翳朱慶
餘舜井詩碧甃磷磷不記年青蘿鑿在小山巔向來
不視千尋水疑若蒼梧萬里天

禹嶺

禹餘糧嶺在了山山下為了溪王銍序言禹治水止於此山中產藥稱禹餘糧蓋餘食所化近有甌山謂嘗炊於此張華博物志曰禹治水棄餘食於江為禹餘糧李羣玉詩曰澗有堯時韭山餘禹伏糧

亞父石跡

亞父山在禮義鄉昔山中老農遇神人曰吾亞父也當宅茲山明日見崖石中有足跡甚大

亞父事出神異經

阮公故居

縣之南有阮公廟即故居也王梅溪詩再入山中去
烟霞鎖翠微故鄉遺宅在何日更來歸

楊黃門埭亭

水經曰吳黃門郎黃哀明居岷縣宏訓里開瀆作埭
埭之西作亭

戴安道宅

戴公宅在剡桃源鄉宋景文公詩舟來戴公宅客過

孝王家鄉有戴村村多戴姓者郝超每聞欲高尚隱
退者輒為辦百萬資並為造立屋宇在剡為遠起宅

甚精整戴始往與所親書曰近至剡如官舍

王徽之
居山陰

夜雪初霽月色清朗四望皓然獨酌酒咏左思招隱
詩忽憶戴逵逵時在剡便夜乘小船詣之經宿方至
造門不前而反人問其故徽之曰本乘興而行盡興
而返何必見安道耶李白雪詩興從剡溪起思統梁
山發孟浩然詩閑垂太公釣興發子猷船陸龜蒙詩
訪戴客愁隨水遠浣沙人泣共溪深項斯寄剡中友
詩山晚迴尋蕭寺宿雪寒誰與戴家期李端詩戴家
溪北住雪後去相尋駱賓王雪詩高人儻有訪興盡
詎須回方干雪詩此時行徑無人跡唯望徽之問寂
寥羅隱詩笑殺山陰雪中客等閒乘興又空迴郎士

元詩或在醉中逢雪夜懷賢應向剡川遊姚勗詩往
時巖之訪安道剡溪扁舟夜獨乘楊蟠詩長愛剡溪
堪發興雪中
魯棹子猷船

戴公山

山在忠節鄉今屬金庭觀可二百畝山中多茂林叢
竹又有清流激湍林崖蒼石互相映帶山之巔有龍
湫

阮光祿東山

阮裕別傳曰裕居會稽剡山志存肥遁世說曰阮光

祿在東山蕭然無事內足於懷

王右軍書樓墨池

金庭觀有書樓墨池裴通為之記裴通詩寂寂金庭
洞清香發桂枝魚吞左慈釣鵝踏右軍池楊蟠有墨
池懷古詩空山寂寞人何在一水泓澄墨尚新

謝車騎桐亭

鄜道元水經曰嶧山東北太湖晉車騎將軍謝玄
舊居所在右濱長江左傍連山陵平脩通澄湖遠鏡

於江曲起樓樓側悉是桐梓森聳可愛民居號為桐
亭樓兩面臨江盡升眺之處蘆人漁子汎濫滿焉湖
中築路東出趨山路甚平直山有三精舍高甍凌虛
垂簷帶空俯眺平湖杳然在下江有琵琶圻臨江有

石牀名釣魚臺

張籍詩見說孤帆去東南到會稽春
雲剡溪口殘月鏡湖西水鶴沙邊立

山廳竹裏啼謝家曾
住處烟洞入應迷

謝車騎坐石

石在寶積山石磊磊疊疊如稜如鑿水經曰樹下有

十二方石地甚方潔

葛仙翁釣臺

皇覺寺有釣臺又有石梯絕為竒怪石上有釣車痕甚分明

白道猷滌巾澗

證道寺澗中有道猷滌巾舊迹水痕如白氎狀

趙公島

謝巖之北通趙公島趙公者晉懷帝時太常樂工也

永嘉二年石勒亂趙公二十四人隱於剡之山島王
公嶠山賦曰崦徑森林北倚趙公之島崦徑在謝巖

北

晉武肅王故跡

晉武肅王嘗到嶠山下於舟中看其嵯峩歎其異境

駐舟賦詩

嶠娘宅梁詔亭

蕭衍經嶠山於嶠家娘子為婚後別嶠娘入齊南面

發詔徵之山上有宣詔亭王公嶠山賦曰梁王別室
歸建業以登天又曰皇書亭畔又看麋滯之蹤

謝康樂石牀

嶠山下有石牀康樂嘗垂釣於此出舊經石下舊有
古人姓名

謝巖彈石

縣北十五里有謝巖靈運游此四顧放彈丸落處為
祠有大石如彈丸王公嶠山賦曰靈運彈飛巖嶂慕

此堪棲

謝公宿處

李白詩謝公宿處今尚在綠水蕩漾青猿啼康樂有
鄉遊謝有鄉謝公所歷也李嘉祐詩緣塘剡溪路映
竹五湖村王謝登臨處依依今尚存陳克詩雨裏落
帆遊謝鄉寒聲古木共荒涼又有謝巖亦所至

王謝飲水

世傳王謝諸人雪後汎舟至此徘徊不能去曰雖寒

強飲一口在縣北二十里

趙廣信井洞

西太白山山有廣信丹井又有洞石沓起如屋可容
數人

褚伯玉隱居

西太白山山有瀑泉宋書曰伯玉隱身求志居剡縣
瀑布山伯玉常居一樓卒葬樓所

褚伯玉太平館

齊高帝即位詔吳會二郡以禮迎遣辭疾而歸詔於
剡白石山立太平館舍之

秦處士麗句亭

系天寶間避地剡川作麗句亭郡守改其居曰秦君
里大歷五年鄴守薛公僕射奏為右衛率府倉曹參

軍系作詩辭之自謂系家於剡山向盈一紀

其詩曰
由來那

敢議輕肥散髮行謔自採薇通客未能忘野興辟書
翻遣脫荷衣家中匹婦空相笑池上羣鷗盡欲飛更
乞大賢容小隱益

又有山中寄張正則評事詩

終年
常避

看愚谷有光輝

喧師事五千言流水閒過院春風與閉門山容邀上
客桂實落華軒莫強教余起微官不足論正系辭辟
之時也
又有耶溪舊居有將移耶溪舊居留贈嚴維祕

書詩

雞犬漁舟裏長謠任興行同邀落日醉已被遠山迎書屐將非重荷衣著甚輕謝生無箇事忽

起為蒼生

又有會稽山居寄薛播侍郎袁高給事高參舍

人詩

稷高今為相明君復是堯寧知買臣困猶負會稽樵當在耶溪舊居作也

又有謝徐

侍郎同諸詩客訪會稽山居詩

忽道仙翁至幽人學拜迎華簪窺甕牖珍

味代藜羹洗硯魚仍戲移樽鳥不驚華亭擘叙却會此越中營

温庭筠宿秦生山齋

詩
幽居路不通結室在東峯歲晚得支遁夜寒逢戴
顯龕燈落葉寺山雪隔林鐘行解一作李無由發曹

溪欲
施春
戴叔倫酬秦徵君徐少府春日見寄
終日媿無
狀與君聊

散襟城根山半腹
亭影水中心
朗詠竹窓
靜野情花
逕深那能有餘興
不作剡溪尋

王翁信舊居

皇甫冉送王翁信還剡中舊居詩

海岸耕殘雪
溪沙
釣夕陽家中何所

有春草
漸看長

王公別業

王公當是前
詩王翁信也

皇甫冉送王公還剡中別業詩

不見關山去
何時到
剡中已聞成樹木
更

道長兒童籬
落雲常聚村墟
水
自通朝朝呼野渡
向晚對清風

袁稠家林

李端寄稠詩

花洞滿沉沉仙壇隔杏林
漱泉春谷冷
搗藥夜窓深石上開仙酌
松間對玉琴

戴家溪北住
雪後去相尋

吳處士溪嶼

賈島憶吳處士詩

半夜長安雨燈前越客吟
孤舟行一月萬水與千岑
島嶼夏雲起汀

洲芳草深何當折
松葉拂石剡溪陰

獨孤處士山居

棲白寄獨孤處士詩

林下別多年相逢事渺然
扁舟浙水上輕策剡山前
坐石吟杉

月眠雲憶島仙何期
歸太白伴我雪中禪

唐氏溪閣

趙湘剡中唐郎中所居詩

古柳垂溪水當門繫雪舟
開門延白鳥掃樹帶清秋

閣上看華頂窓中見沃洲
尋常投刺少來即是詩流

古阡

漢朱買臣墓

縣北六里有石羊買臣吳人墓在剡可疑然暨陽有

買臣書堂及祠

阮裕墓

縣東九里

山桐公墓

縣東故港有高冢世傳謝氏祖墓

戴顓墓

縣北一里王僧虔吳郡記曰顓死葬剡中有後人所立石表梅聖俞寄剡縣主簿詩應識道旁碑因風奠醪醴王梅溪詩千年戴顓墓三字道旁碑紹興二年

宰范仲將為作享堂於墓下堂今不存嘉泰三年四
明樓鑰為書本傳立碑於道左嘉定八年令史安之
重建墓亭以脩時祀及於亭左右繪剡中先賢像

王右軍墓

去縣東孝嘉鄉五十里

刻錄卷四